

**Sud Bosne i Hercegovine  
Суд Босне и Херцеговине**

---

**Broj: S1 3 Iž 038042 20 Iž  
Sarajevo, 23.10.2020. godine**

Sud Bosne i Hercegovine, u vijeću Apelacionog odijeljenja sastavljenom od sudija Srete Crnjaka, kao predsjednika vijeća, Dinke Bešlagić Čovrk i Vesne Trifunović, kao članova vijeća, odlučujući o žalbi Vesne Maksimović, Birčaninova 93/A, 23261 Lukićevo Zrenjenin, R Srbija, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 23.10.2020. godine, donio je

**R J E Š E N J E**

**Žalba se odbija.**

**O b r a z l o Ź e n j e**

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žaliteljicu odbijen je upis iz razloga što je ista registrovana na više različitih adresa.

Žaliteljica je protiv navedene odluke blagovremeno izjavila žalbu navodeći da se uredno prijavila za glasanje van BiH na adresu Birčaninova 93/A, 23261 Lukićevo Zrenjenin, R Srbija, ali je odlukom CIK-a odbjena.

Centralna izborna komisija Bosne i Hercegovine u odgovoru na žalbu navodi da su za podnositeljicu žalbe dostavljeno pet prijava u kojima su navedene različite adrese na koje će biti upućen glasački materijal, te da žaliteljica nije dostavila potvrdu

nadležnog organa o prebivalištu/boravištu izvan BiH, zbog čega predlaže da se žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Iz stanja spisa proizlazi da je Centralna izborna komisija BiH prije donošenja pobijane odluke, utvrdila da je za navedeno lice dostavljeno pet (5) prijava na obrascu PRP-1-Prijava za glasanje izvan BiH, te da su navedene različite adrese na koje će biti upućen glasački materijal. U konkretnom slučaju u prvoj prijavi je navedena adresa Zmajeva 18, 19000 Zaječar, R Srbija, u drugoj prijavi je navedena adresa Radivoja Dimitrijevića 8, 15356 Bogovinci - Glušci, R Srbija, u trećoj prijavi navedena je adresa Birčaninova 93/A, 23261 Lukićevo Zrenjenin, R Srbija, u četvrtoj prijavi navedena je adresa Obrež bb, 22417 Obrež, R Srbija, dok u peto prijavi navodi adresu Put za Crvenku V deo 13 Đ, 11211 Borča Beograd, R Srbija.

I po shvatanju apelacionog vijeća, druge dostavljene prijave žaliteljice Vesne Maksimović se ne mogu smatrati obaviješću o promjeni podataka u smislu člana 3.16 stav 1. Izbornog zakona BiH, s obzirom da podnositeljica žalbe podnošenjem drugih prijava nije ukazala da ima saznanja o podnesenoj prvoj prijavi, kada bi se moglo cijeniti da druge podnesene prijave predstavljaju promjenu podataka o boravištu u inostranstvu.

Tačna adresa stanovanja državljanina BiH koji privremeno živi u inostranstvu, ima biračko pravo i upisan je u Centralni birački spisak, predstavlja obavezni element prijave propisan članom 3.15 stav 1. Izbornog zakona (Sl. glasnik BiH br.23/01 sa izmjenama). Državljanin BiH je shodno članu 3.16. stav 1. citiranog zakona obavezan Centralnu izbornu komisiju BiH obavijestiti o promjeni podataka koje je predhodno dostavio, i to do isteka roka utvrđeno za podnošenje prijave za glasanje van BiH.

Kako podnositeljica žalbe nije Centralnoj izornoj komisiji BiH dostavila, u smislu člana 3.15 stav 1. i 7. Izbornog zakona BiH, potvrdu nadležnog organa o prebivalištu/boravištu izvan BiH kako bi se sa sigurnošću moglo zaključiti da je adresa na kojoj zahtjeva da bude registrovana prava adresa njenog prebivališta/boravišta u inostranstvu, to i prema shvatanju apelacionog vijeća Centralna izborna komisija BiH nije bila u mogućnosti da utvrdi koja je od podnesenih prijava vjerodostojna. Tu činjenicu je dužna dokazati podnositeljica prijave u smislu navedene odredbe Izbornog zakona BiH. S tim u vezi, pravilna je i zakonita odluka Centralne izborne komisije BiH, da navedenom licu odbije upis u izvod iz Centralnog biračkog spiska za glasanje izvan BiH.

Napomene radi, žaliteljici nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer ista može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA  
S U D I J A**

**Sreto Crnjak**